



**LIAFUAN BADAK HUSI SUA EXSELÉNSIA PRIMEIRU-
MINISTRU
REPÚBLIKA DEMOKRÁTIKA TIMOR-LESTE,
TAUR MATAN RUAK**

**IHA SERIMÓNIA ASINA KONTRATU SUBVENSAUN
BA KONFERÉNSIA EPISKOPÁL TIMORENSE**

Ministériu Finansas, loron 23 fulan-setembru tinan 2019

Sua Exelénsia Reverendísima, Dom Virgílio do Carmo da Silva SDB, Arsebispu Metropolitanu Dili nian

Sua Exelénsia Reverendísima, Dom Norberto do Amaral, Bispu Dioseze Maliana no Prezidente Konferénsia Episkopál Timor-Leste nian;

Sua Exelénsia Reverendísima, Dom Basílio do Nascimento, Bispu Dioseze Baukau nian;

Sua Exelénsia Chargé d’Affaires Nunsiatúra Apostólíka Dili nian, Monsignor Marco Sprizzi

Señora no Señor sira

Distintu Konvidadu sira

Molok atu hahú, ha’u hakarak fahe ha’u-nia tristeza kle’an ba Saudozu Padre João de Deus ne’ebé ita hotu hadomi, ne’ebé husik ona mundu horiseik, iha liman ha’u-nia liman.

Ida-ne’e nu’udar momentu ne’ebé nakonu ho emosaun mai ha’u, tanba Señor Padre João de Deus iha momentu ne’ebá parese hein hela ha’u atu hato’o adeus. Ko’alia tiha liafuan ruma no dada iis naruk, nia ba, hodi husik hela sarani, família, no belun barak husi Igreja no husi comunidade Saleziana nian hanesan oan-kiak.

Hela de’it nia obra no lembransa hanesan Bibi atan ne’ebé di’ak, domin-na’in no dedikadu ba nia bibi sira, iha lora ne’ebé, tanba koincidénsia, ita fó dala ida tan subvensaun públika ba Igreja nia obra sosiál sira.

Iha lora 14 fulan agostu tinan 2015, Governu Timor-Leste asina ona Akordu ida ho Santa Sé ho objetivu atu hatuur, ho dalan ne’ebé estavel, kuadru jurídiku kona-ba relasaun entre Estadu rua ne’e.

Akordu ne'ebé hetan ratifikasaun liuhusi Rezolusaun Parlamentu Nasionál n. 18/2015, lora 11 fulan-novembru ne'e, prevee kontribuisaun anuál ida, tui disponibilidade finanseira Governu nian, ba atividade ho karakter sosiál, edukativu no atividade governu ekleziál Igreja Katólíka nian.

Akordu ne'e prevee mós katak kuantitativu no modalidade husi subvensaun ne'e sei regula ho akordu espesífiku sira entre Governu no Konferénsia Episkopál Timor-Leste nian.

Ho ksolok boot mak ohin ita partisipa iha serimónia asinatura ba kontratu subvensaun nian ida-ne'e, ne'ebé define kuantitativu no modalidade husi subvensaun ne'ebé atu fó iha tinan finanseiru 2019, no ba ida-ne' aloka ona montante ida ho valór dolar amerikanu millaun sanulu "atu fó Apoiu ba Konferénsia Episkopál", ho prioridade sira tuirmai ne'e:

- a) 50% hosi valór subvensaun nian ba atividade sira ho karakter edukativu;
- b) 25% atu uza ba atividade sira ho karakter sosiál;
- c) 15% atu uza ba atividade sira ho karakter governu ekleziál; no
- d) 10% atu uza ba jestaun subvensaun ne'ebé fó ona.

Igreja Katólíka hala'o knaar importante ida durante Luta ba Libertasaun Nasionál, tui saida mak hateten ona iha ita-nia Konstituisaun, no kontinua hala'o knaar fundamentál iha faze dezenvolvimentu nasional nian oras ne'e, hodi presta ona ho qualidade servisu sira iha área edukasaun, saúde, apoiu ba ema sira kbiit-laek, vulneravel, no ema sira-ne'e la hetan atensaun, ho karidade ne'ebé boot no domin sarani nian ba ita-nia maun-alin sira.

Igreja Katólíka mós nu'udar parseiru ativu ida ne'ebé empenhadu, interesadu no besik tebetebes ba Estadu, Autoridade no ninia comunidade sira, hodi atua iha área ka fatin barak iha país laran, ne'ebé seidak benefisia asesu tomak ba servisu públiku sira Estadu nian.

Uma Kreda kontribui mós ba Edukasaun Sívika ida ne'ebé importante tebes atu forma didi'ak ita-nia sidadaun sira, la'ós de'it iha nivel tékniku ka sientífiku iha eskola no koléjiu lubuk boot, ne'ebé komplementa no kompleta rede ensinu públiku nian, maibé mós iha parte importante sira hanesan morál, étika no dixiplina, iha nivel umanu no relijiozu.

Investimentu ne'ebé agora fó liuhusi tulun osan ba jestaun Konferénsia Episkopál Timor-Leste nian, durante tinan fiskál 2019, garante kumprimentu ba preseitu sira ne'ebé hanesan interese públiku nian, ne'ebé fó valór ba Igreja Katólíka tanba servisu di'ak sira-ne'ebé halo ona, liuliu ba ema ne'ebé presiza liu investimentu no atensaun husi Estadu nia.

Labarik sira, oan-kiak sira, ferik-katuas sira, ema-moras sira, dadur sira, ema aleijadu sira ka sira-ne'ebé susar atu book an, sira-ne'ebé kiak liu no iha risku sosiál, ka ho liafuan badak atu dehan ema ne'ebé de'it maka presiza domin no solidariedade sosiál. Tanba ne'e, ha'u aproveita biban ida-ne'e atu fó valór ba obra edukativa, sosiál no ekleziál husi instituisaun atus ba atus ne'ebé namkari iha territóriu tomak, liuliu ba relijiozu sira, profesór sira, funsionáriu sira, voluntáriu no leigu sira, ne'ebé loroloron, ho sira-nia esforsu no dedikasaun tomak, kontribui nafatin ba misaun boot estratéjika Estadu nian ida-ne'e, hodi forma sidadaun ne'ebé matenek, isin-di'ak, nakonu ho interese, ativu no partisipativu, hatene oinsá aproveita oportunidade sira no kontribui ba dezvoltamentu nasaun, comunidade no sira-nia família ida-idak nian.

Ita hotu hein katak subvensaun ne'ebé ita asina daudaun ninia kontratu ne'e bele fó benefísiu boot ba ita-nia Povu nia moris-di'ak.

Maromak sei haraik Nia bénsaun mai ita hotu iha misaun ida-ne'e!

Obrigadu barak ba imi hotu nia atensaun.